

**Uunga siunnersuut: Eqqumiitsuliornermik ingerlatsineq pillugu Inatsisartut
inatsisaannut allannguutissatut
siunnersuut**

*Ilinniartitaanermut, Kultureqarnermut, Timersornermut Ilageeqarnermullu
Naalakkersuisumit saqqummiunneqartoq*

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutit aappassaaneerpeqarnerannut

ISUMALIUTISSIISSUTAA

Ataatsimiititaliap sularinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Nivi Olsen, Demokraatit, siulittaasup tullia
Inatsisartunut ilaasortaq Mala Høy Kúko, Siumut
Inatsisartunut ilaasortaq Mariia Simonsen, Inuit Ataqtigiit
Inatsisartunut ilaasortaq Eqaluk Høegh, Inuit Ataqtigiit

UKA2022-mi ulloq 5. oktober 2022 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Matumani eqqumiitsuliornermik ingerlatsineq pillugu inatsisip allanngortinneqarnissaa pillugu siunnersuutigineqartumi Naalakkersuisut ataqqinaammik tunniussisalernissaannut inatsisitigut tunngavissiissaaq. Eqqumiitsuliornermik ingerlatsisut sisamat nersornaammik aningaasatigullu tapiissummik ukiunut qulikkaartumik tunineqartarnissaat ataqqinaammik tunniussisarnermi siunertarineqarpoq. Ataqqinaammik tiguisussat annerpaamik ataatsikkut sisamat tunineqarsinnaapput. Ataqqinaammik tunniussassat aningaasat tunngaviusut ukiumut ataatsimut 250.000 kr.-iusut siunnersuummi aalajangiunneqarpoq, tassani aningaasat tunngaviusut procenti aaqqiissutissaaq naapertorlugu iluarsineqartassallutik. Taamaattorli aningaasat isertitat naapertorlugit ataqqinaammik tunniunneqartussat annertussusilerneqartassasut aamma aalajangiunneqarpoq, taamaalilluni allatigut isertitaqaraanni aningaasat tunniunneqartussat annikillisinneqarsinnaallutik. Nalunaarummi isertitat naapertorlugit annertussusiliinissaaq pillugu malittarisassiornissamut Naalakkersuisut

inatsisitigut tunngavilerneqarput. Ataqqinaammik tunniussassaq eqqumiitsuliortunut eqqumiitsulianik ingerlatsisunut, eqqumiitsuliortutut imminnut taasinnaasunut, tunniunneqarsinnaasuusaaq. Ataqqinaammik tunniussassaq taamaalilluni eqqumiitsuliortunut ukiorpassuarni suliarnikk ingerlatsisimasunut eqqumiitsuliortutullu nersugaanermik annertuumik angusaqarsimasunut piukkunneqarluni.

Tamatuma saniatigut eqqumiitsuliortut eqqumiitsulianik ingerlatsinerminnut piginnaasaminnullu akissarsitinneqarnissaannut siunnersuut inatsisitigut tunngavissaqartitsilissaaq. Taamatut akissarsititsisarnissap siunertaraa eqqumiitsuliortut aningaasatigut tapersorsorneqalernissaat, taamaalillutik eqqumiitsuliornikkut piginnaasaminnik ineriartortitsisissinnaalerlutik.

Akissarsititsinissaq ataqqinaammillu tunniussinissaq tunngavigalugu eqqumiitsuliortunik toqqaalernerminni piunasaqaatit sorliunissai pillugit aalajangersakkat erseqqinnerusut kingusinnerusukkut nalunaarusiornermi aalajangerneqarumaarput.

Eqqumiitsuliortut aningaasatigut tapersorsorneqarnissaat kiisalu eqqumiitsuliat inuiaqatigiinni pingaaruteqassusaata ukkatarineqarnissaat tunniussisarnissanut siunertaapput.

2. Siunnersuutip Inatsisartuni siullermeerneqarnera

Siullermeerinninnermi siunnersuummut assigiinngitsunik qisuariartoqarpoq. Eqqumiitsuliornermik ingerlatsinerup tapersorsorneqarnissaata pingaaruteqassusaa isumaqataaffigineqarluarpoq. Taamaattorli suna tunngavigalugu eqqumiitsuliortut ataqqinaammik tunineqarnissaminnut toqparneqartassanersut kiisalu ataqqinaammik tunniussassap tunngaviumik annertussusissaa aammalu qaqugukkut tunniunneqartassanersooq oqallinnermi apeqquserneqarput. Tamatuma saniatigut kingumoortumik ataqqinaammik tunniussisoqarnani sulinissamut tapiissutit amerlanerusut taarsiullugit tunniunneqartarsinnaannginnerusut apeqqutigineqarpoq.

3. Tusarniaanermut akissutit

Siunnersuut piffissami ulloq 30. majimit ulloq 24. juni 2022 tungaanut tusarniaassutigineqarsimasooq Naalakkersuisut paasissutissiissutigaaq. Tusarniaanermut akissutit inatsisissatut siunnersuummut kakkiunneqarput, tamanna Inatsisartut Siulittaasoqarfiata ilusiliinissamut piunasaqaataanut naapertuuppoq.

4. Apeqqutit

Ataatsimiititaliap siunnersuummik suliarinninnissaminut Ilinniartitaanermut, Kultureqarnermut, Timersornermut Ilageeqarnermullu Naalakkersuisooq apeqqutinik akissuteqaqqullugu qinnuigaa. Ataatsimiititaliamit apeqqutigineqartut assilineri aammalu

Ilinniartitaanermut, Kultureqarnermut, Timersornermut Ilageeqarnermullu Naalakkersuisup akissuteqaataata assiliner a isumaliutissiissummut matumunnga ilanngussatut kakkiiunneqarput.

5. Ataatsimiititaliap siunnersuummik suliarinninnera

Eqqumiitsuliornermut nunatsinnilu eqqumiitsuliortut tapersorsornissaannut annertuumik isumaqatigiittoqartoq ataatsimiititaliamit maluginiarneqarpoq.

5.1 Eqqumiitsuliornermik ingerlatsineramik naliliineq kiisalu ataqqinaammik tunniussassat agguataarneqarnerat

Kikkut ataqqinaammik tunineqartassanersut sunalu tunngavigalugu tunineqartassanersut pillugu nassuiaat siunnersuummi naammaginatut nassuiarneqarsimanngitsoq ataatsimiititaliamit maluginiarneqarpoq. Eqqumiitsuliortup suliaanic nalilersuineq tunngavigalugu ataqqinaat tunniunneqartartoq kiisalu pitsaassutisimik nalilersuineq eqqumiitsuliornermik sulialinnit nalilerneqartartoq oqaaseqaammi allaqqapput. Eqqumiitsuliortup ataqqinaammik tunineqarnissaanut suut tunngavilersuutaanersut pillugit oqaaseqaatigineqartut matumani naammaginarpallaanngitsuusut ataatsimiititaliamit malugineqarpoq.

Siunnersuummi matumani Naalakkersuisut akissuteqaatiminni ilisimatitsissutigat ataqqinaammik tunniussisarnerup allaffissornerata Eqqumiitsuliornermut aningaasaateqarfimmut taassumalu siulersuisuinut inissinneqarnissaa pilersaarutaasoq. Tassani naalakkersuinikkut akuleruttoqartannginnissaa pilersinniarneqarpoq kiisalu ataqqinaammik tunniussisarnerit naalakkersuinikkut iliuitsit malinnagit eqqumiitsuliornermik ilisimasalimmit naliliineq tunngavigalugu ingerlanneqartarnissaat qulakkeerniarlugu. Kikkut ataqqinaammik tunniussiffigineqartassanersut pillugu piumasaqaatit pingaarnerit assigiinngitsut nalunaarusiornermik aalajangersarneqarumaarput. Naalakkersuinikkut akuleruttoqannginnissaa qulakkeerniarlugu tamanna Eqqumiitsuliornermut aningaasaateqarfik suleqatigineratigut pissaaq. Naalakkersuisut allakkatigut apeqqutinut akissuteqaataani piumasaqaatit qanoq aalajangersarneqarsinnaanersut pillugu nassuiaat takuneqarsinnaavoq. Ataqqinaammik tunniussassat eqqumiitsuliornermik suliaqartartut assigiinngitsut akornanni ima agguataarneqartassasut eqqumiitsuliornermik suliaqartartut tamarmik isiginiarneqarlutik Naalakkersuisut akissummi nassuiaateqarfigaat. Tamanna Eqqumiitsuliornermut aningaasaateqarfiup kiisalu eqqumiitsuliortut kattuffiisa akuutinneqarnerisigut nalunaarusiornermik aalajangersarneqassasoq naatsorsuutigineqarpoq. Eqqumiitsuliornermut aningaasaateqarfiup akuutinneqarnissaanut siunertaq taamaalillunilu naalakkersuinikkut akuleruttoqannginnissaanic qulakkeerrinninnissaq Naalakkersuisunit piviusunngortinneqassasoq ataatsimiititaliamit kaammattuutigineqarpoq.

5.2 Ataqqinaammik tunniussassat tunngaviummik aningaasartai piffissarlu

Tamatuma saniatigut eqqumiitsuliortumut ataasiinnarmut piffissamut ukiut qulikkaarumut

aningsaat annertujaartut tunniunneqartassasut ataatsimiititaliamit maluginiarneqarpoq. Siunnersuummut matumunnga atatillugu eqqumaffigisassat arlaqarput. Naalakkersuisut ilisimatitsissutigaaat eqqumiitsulianik pingaartitsineq kiisalu eqqumiitsuliortut ineriartornissaannik qulakkeerinninneq eqqumiitsuliortunut tunniussisarnissap siunertarigaa, taamaalillutik eqqumiitsuliornermik ingerlatsiinnarnissaminnut periarfissaqarniassammata. Ataqqinaat taanna eqqumiitsuliornermik suliaqartarnikuunermik tunngaveqarluni tunniunneqarsimappat ataatsimiititaliamit ima paasineqassaaq, naliliineq siunnersuutip sunniutissaatut kissaatigineqartumik piviusunngortitsisinnaanngitsoq. Taamaattumik inatsit kissaatigineqartutuut sunniuteqartarnersoq pillugu ataavartumik nalilersorneqartarnissaa ataatsimiititaliamit kaammattuutigineqarpoq.

Ilutigisaanik ataqqinaammik tunniunneqartartut isertitat napertorlugit annertussusilerneqartartut maluginiarneqarpoq aammalu annertussusiliinissamut maleruagassat nalunaarusiornikkut aalajangersarneqassasut. Siunnersuutip oqaaseqaataani ataasiakkaani allaqqanngilaq qanoq isertitat naapertorlugit annertussusiliisarneq sulinermit atortussanngortinneqassanersoq, kisiannili 250.000 kr.-t tunniunneqarsinnaasunut annerpaajussasoq kiisalu tunineqartussap ukiumi taaneqartumi isertitarisimasai apeqquutaallutik aningsaat annikillisinneqarnissaat pillugu nalunaarummi malittarisassanik aalajangersaanissaq taamaallaat allassimavoq. Siunnersuummut matumunnga Naalakkersuisut ataatsimiititaliap apeqquteqaataanut akissuteqarnermini ilisimatitsissutigaa tamanna nalunaarusiornikkut aalajangersarneqarumaartoq. Naalakkersuisut akissuteqaataanni kakkiunneqartumi isertitat naapertorlugit annertussusiliisarneq sulinermit qanoq atortussanngortinneqarsinnaanersoq pillugu periarfissat assigiinngitsut allaqqapput.

6. Siunnersuutip aningsaatigut kingunerisassai

Siunnersuut piviusunngortinneqarpat aningsaatigut kingunerisassai siunnersuummi nalinginnaasumik oqaaseqaataani nassuiarneqarput. Tassani eqqumiitsuliortunut ataqqinaammik tunniussisoqartalernissaanut akissarsititsisoqartalernissaanullu inatsisitigut tunngavissaqalersitsimmat siunnersuut aningsaatigut kinguneqassasoq eqqaaneqarpoq. Inatsisit atuuttut naapertorlugit tapiissutit tunniunneqartareersut saniatigut taamatut tunniussisarnertit pialissapput. Taamaattumik siunnersuummik uuminnga akuersineq nunatta karsianut aningsaartuutit annertunerulernerannik kinguneqassaaq. Naatsorsuutigineqarpoq ataqqinaammik tunniussisarnermut aningsaartuutit annertunerulernerat ukiumut 1 million kr.-ussasoq kiisalu akissarsititsisarnernut ukiumut 80.000 kr..

7. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqatigiinneersut aamma Siumumeersut siunnersuummut ima oqaaseqaatissaqarput:

Kultureqarnerup inerisarneqartuarnissaa eqqumiitsuliortullu ataasiakkaat nukittorsarneqartarnissaa siunnersuummi taperserneqartussatut isigigaat. Siunnersuummi sinaakkutaasut malillugit eqqumiitsuliortut inuusuttut suliaminni tapersorsorneqarnerat ukkatarineqarnerulissasoq ataatsimiititaliamit kissaatigineqartoq maluginiarneqarpoq. Taamaattumik eqqumiitsuliortut inuusuttut qanoq iliornikkut ataqqinaammik akissarsitinneqartalersinnaanersut pillugu isumaliutissiisummut ilanngullugu eqqarsaasersuuteqarfigeqqullugu ataatsimiititaliami amerlanerussuteqartut qulaani taaneqartut Naalakkersuisunut kaammattuutigivaat.

Amerlanerussuteqartut qulaani allassimasut tamanna tunngavigalugu siunnersuut akuerissutigineqassasoq innersuussutigaat

Ataatsimiititaliami ikinnerussuteqartut Demokratineersut siunnersuut pillugu ima oqaaseqaatissaqarput:

Demokraatit maani nunatsinni eqqumiitsuliortut eqqumiitsulioriaatsini tamani suliaat nersortarialittut isigaa. Upperaarput, eqqumiitsuliortut eqqumiitsuliornerlu ulluinnarni nuannaarnermik pilersitsisartut, taamaattumillu aamma isumaqarluta, eqqumiitsuliornerup tapersorsornissaa pingaartuusoq.

Tapersorsinnaanngilarpulli ukiuni qulini ataqqinaammik akissarsisitsisarnissamik isumassarsiaq. Inuunerissaarnissamut pingaaruteqartunut soorlu peqqinnissaqarfimmu, meeqqat atuarfiannut ulluunerani paaqqinnittarfinnut akissaqarata, pingaarnersiuneq kukkunertut isikkoqarpoq ataqqinaammik akissarsisitsisarnissaq. Kissaatiginerugaluarparput, annertunerusumik eqqumiitsuliortut sulinerannut akissarsisitsisarnissaq imaasillugu, eqqumiitsuliat nutaat nuannaarutissanngorlugit

Erseqqissarusupparali, pisartagaqartalernissamik isuma ajunngikkaluarmat, aningaasaatittali sumut atornissaat pingaarnersiortariaqarparput. Tassani Demokraatit isumaqarput, pissutsinik pitsanngorsaannermut aningaasat atoraanni pingaarnersuusoq soorlu Peqqinnissaqarfimmi, meeqqat atuarfianni, meeqqanut sumiginnakkanut ikiorsiinernut, utoqqaat atugaannut, innarluutillit atugaannut, angerlarsimaffeqanngitsut atugaannut allanullu atugarissaarnissamut pingaaruteqartunut.

Eqqumiitsuliortunut nersornaasiisarnissaq oqaatigineqareersutut ajunngilluinnarpoq, Demokraatilli pingaarnersiuneranni appasissorujussuulluni, isummatsinnut, inuaqatigiit maanna inissisimanitsinni aningaasanik atuinissaanut.

Qulaani allassimasoq ataatsimiititaliami ikinnerussuteqarluni innersuussissutigaat tamanna tunngavigalugu siunnersuut itigartitsissutigineqassasoq.

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

Doris Jakobsen Jensen
Siulittaasoq

Nivi Olsen
Siulittaasup tullia

Eqaluk Høegh

Mala Høy Kúko

Mariia Simonsen



INATSISARTUT

Ilanngussaag Bilag

Ilinniartitaanermut,
Timersornermut
Naalakkersuisoq
ikiin@nanoq.gl

Kultureqarnermut,
Ilageeqarnermullu

Ulloq: 24-10-2022

J.nr.:01.39.01.03-00257

Allakktigut apeqqutit Imm. 118 Uunga siunnersuut: Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuut pillugu

Eqqumiitsuliornermik ingerlatsineq pillugu inatsimmut allannguutissatut siunnersuutip siullermeerneqarnerata kingorna Ataatsimiititaliamit apeqqutit tulliuuttugut allaqqasut Naalakkersuisunut akissuteqarfigeqquneqarput:

1. Eqqumiitsuliornermik suliaaniq nalilersuineq tunngavigalugu ataqqinaat tunniunneqartartoq kiisalu pitsaassutsimik nalilersuineq eqqumiitsuliornermik sulialinnit naliliinerusoq siunnersuutip oqaaseqaataani allaqqavoq. Taamatut eqqumiitsuliornermik sulialinnit naliliisarneq qanoq sulinermi ingerlanneqartalissanersoq pillugu Naalakkersuisut nassuiaateqaqquneqarput, tassunga ilanngullugit ataqqinaammik tunniussisoqassatillugu piumasaqaatit sorliit pingaernerutinneqassanersut?
2. Eqqumiitsuliornermik assigiinngitsut akornanni ataqqinaammik tunniussisarnerit qanoq agguataarneqartassanersut pillugu Naalakkersuisut nassuiaateqaqquneqarput.
3. Ataqqinaammik tunniuttakkat isertitat naapertorlugit tunniunneqartarnissaat pillugu allaqqasut pillugit Naalakkersuisut nassuiaateqaqquneqarput. Ataqqinaammik tunniuttakkat isertitat naapertorlugit annertussusilernissaannut isertitat sorliit atorneqartassanersut pillugu Naalakkersuisut akissuteqaatissaminni isummersuuteqaqquneqarput, eqqumiitsuliornermik nammineq isertitai aallaavigineqassanersut imaluunniit illoqutigiinni isertitat allat sunniuteqaqataassanersut aammalu eqqumiitsuliornermik eqqumiitsuliornermik suliaminut allamik akissarsitinneqassagaluarpat ataqqinaammik tunniussassat aamma iluarsivigineqassanersut.
4. Siuliani apeqqutigineqartumut tapiliullugu Naalakkersuisut qinnuigineqarput annertussusiliisarneq 1:1 atorlugit isertitat naapertorlugit annertussusiliisarnissaq naatsorsuutigineqarnerusoq nassuiaateqaqqullugit, kiisalu naatsorsuutigineqarnerusoq allamik isertitaqarnermut atatillugu ataqqinaammik tunniussisoqarnissaa pinngitsuussagaluarpat isertitat naapertorlugit annertussusiliisarneq miinnerpaaffissalernerneqassanersoq.
5. Oqaaseqaatini arlalitsigut allaqqavoq ataqqinaatissiissutinut tunniunneqartartunut aningaasat annerpaamik 250.000 kr.-iusut. Taamaattorli inatsimmi ima allaqqalluni

anigaasat tunngaviusut ukiumut ataatsimut 250.000 kr.-iusut anigaasallu tunngaviusut procenti aaqqiissutissaq naapertorlugu iluarsineqartassasut anigaasallu isertitat naapertorlugit annertussilerneqartassasut. Ataqqinaammik tunniuttakkat annertunerpaaffissaata procentilu aaqqiissutissaq naapertorlugu iluarsisarnerup imminnut ataqatigiinnerat pillugu Naalakkersuisut erseqqissaassuteqaqquneqarput.

Piaartumik allakkatigut akissutisinissaq (kalaallisut danskisullu) ataatsimiititaliamit piumasarineqarpoq. Akissutit qarasaasiakkoorlugu ataatsimiititaliap allattaanut assilinertalerlugit uunga nassiunneqarnissaat qinnutigineqarpoq; aihjo@ina.alla.gl aamma Inatsisartut (inatsisartut@inatsisartut.gl). Akissuteqaat kingusinnerpaamik ulloq 1. november nassiuteqquneqarpoq.

Qujareerlunga,

Kultureqarnermut, Ilinniartitaanermut Iisimatusarnermut Ilageeqarnermullu Ataatsimiititaliap sinnerlugu.

Inussiarnersumik inuulluaqqusillunga



Doris J. Jensen

Ataatsimiititaliap Siulittaasua



Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq.

ATT.: Ataatsimiititaliami allatsi Anna Ida Hallgaard Jonsson.

E-mailikkut uunga nassiunneqarpoq inatsisartut@inatsisartut.gl uungalu assinga
aiho@ina.ala.gl.

Ilanngussaq
Bilag

**UKA2022/118-mut allakkatigut apeqqutinu akissutit siunnersuummut uunga:
Eqqumiitsuliornermik ingerlatsineq pillugu Inatsisartut inatsisaannut
allannguutissatut siunnersuut pillugu.**

31-10-2022
Suliap nr. 2021 - 13018
Akt nr. 21562554

Postboks 1029
3900 Nuuk
Tlf: +299 34 50 00
Email: ikin@nanoq.gl
www.nanoq.gl

24. oktober 2022-mi apeqqutit tallimat uunga tunngasut tiguakka UKA2022/118 Uunga
siunnersuut: Eqqumiitsuliornermik ingerlatsineq pillugu Inatsisartut inatsisaannut
allannguutissatut siunnersuut. Kultureqarnermut, Ilinniartitaanermut, Ilisimatusarnermut
Ilageeqarnermullu Ataatsimiititaliaq apeqquteqarneranut matumuuna qutsavigaara,
apeqqutillu assilneqarneri "silitunik" naqinnernik allanneqarput, taakkunungalu
tulliullutik "nalinginnaasut" naqinnerit atorlugit Naalakkersuisut sinnerlugit akissutikka:

**1. Eqqumiitsuliortup suliaanik nalilersuineq tunngavigalugu ataqqinaat
tunniunneqartartoq kiisalu pitsaassutsimik nalilersuineq eqqumiitsuliornermik
sulialinnit naliliinerusoq siunnersuutip oqaaseqaataani allaqqavoq. Taamatut
eqqumiitsuliornermik sulialinnit naliliisarneq qanoq sulineri
ingerlanneqartalissanersoq pillugu Naalakkersuisut nassuiaateqaqquneqarput,
tassunga ilanngullugit ataqqinaammik tunniussisoqassatillugu piumasaqaatit
sorliit pingaarnerutinneqassanersut?**

Naalakkersuisut akissutaat:

Siunnersuutip suliarinerani siunnersuutip piviusunngortinneqarnissaa
oqallisigineqartarpoq, soorlu ataqqinaammik tunniussisoqartarnissaa allaffissornikkut
qanoq ingerlanneqartassanersoq. Siunnersuummut oqaaseqaatini allaffissornikkut
ingerlatsinissamut eqqarsaatit suuneri imatut allassimapput:

"Siunnersuummi ataqqinninnermi tunniuttakkanik aamma nersornaasiilluni
tapisiaqartitsinissamut Naalakkersuisut pisinnaatinneqarput. Kultureqarnermut
Naalakkersuisup Namminersorlutik Oqartussat Kulturikkut nersornaataannik
agguaassisarnerata ingerlaannarnissaanik tamanna kinguneqassaaq. Aamma
ataqqinninnermi tunniuttakkanik ingerlatsinermik isumaginnittuunerup, ungasinngitsukkut
pilersinneqartumut Eqqumiitsuliornermut Aningaasaateqarfimmut, Naalakkersuisut
tunniussinnaanerata periarfissaavoq, tak. eqqumiitsuliornermik ingerlatsineq pillugu
Inatsisartut inatsisaata allanngortinneqarnera pillugu Inatsisartut inatsisaat nr. 25, 28.
november 2019-imeersumi § 16 a. Eqqumiitsuliornermut Aningaasaateqarfiup
Kultureqarnermut Naalakkersuisumut innersuussineratigut ataqqinninnermi
tunniuttakkanik tapisiaqartitsinissap isumagineqartarnissaa periarfissat
pingajorisinnaavaat."

Ataqqinninnermi tunniuttakkanik tapisiaqartitsinissap allaffissornikkut
isumagineqartarnissaa Eqqumiitsuliornermut Aningaasaateqarfiup pitsaanerpaamik
ingerlassinnaassagaa uunga isumaqarpunga, taamatullu eqqumiitsuliornermik

ilisimasaqartut naliliinerat ingerlanneqartassalluni Eqqumiitsuliornermut Aningaasaateqarfimmit. Aammalu imatut paasivara UKA2019/156-ip Inatsisartuni suliarineqarnerani siullermik oqallisigineqartoq eqqumiitsuliornermik aningaasaateqarfik ataqqinninnermi tunniuttakkanik tapisiaqartitsineq isumagisinnaaneraa, tassanilu ilaalluni taamani ataatsimiititaliap isumaliutissiissutaani piunasaqaataasoq eqqumiitsuliornermik aningaasaateqarfik ataqqinninnermi tunniuttakkanik tapisiaqartitsineramik allaffissornikkut ingerlatsisuussasoq.

UKA2019/156-imi siunertaavoq eqqumiitsuliornermik aningaasaateqarfiliornissaq, eqqumiitsuliornermut tapiissuteqarluni aalajangiinnermut naalackersuinnikkut suliaqartut akuliussinnaajunnaarsillugit, kiisalu eqqumiitsuliornermi tapiissutinik qinnuteqartut ilisimasalinnit (eqqumiitsuliornermut ilisimasallit) aalajangiinissaq sioqqullugu nalilerneqartassasut. Ataqqinninnermi tunniuttakkanik tapisiaqartitsinermi tamanna siunertaq pingaaruteqartoq aamma isumaqarpunga, tassami naalackersuinnermik suliaqartut akuleruttannginnissaat pilersinneqartariaqarmat, aamma ilisimasalinnik misissorneqartarnissaat ingerlanneqartariaqarmat, taamaattumillu isumaqarpungattaq allaffissornikkut ingerlatsineq Eqqumiitsuliornermut Aningaasaateqarfiup isumagisinnaappagu pitsaanerpaassasoq. Eqqumiitsuliornermut Aningaasaateqarfiup 2021-mi pilersinneqarneraniit aningaasaateqarfiup eqqumiitsuliornermut tapersiisarnissaanut sinaakkusiinissamik suliaq annertoq ingerlasimavoq.

Eqqumiitsuliornermut Aningaasaateqarfik siulersuisunit aquneqarpoq, taakkulu ingerlatsineq aamma Aningaasanut Inatsimmi aningaasaliissutigineqarsimasut eqqumiitsuliornermi suliniutinut aamma suliaqarnermi pisartagassanut tapiissutigineqartarnissaannut aalajangiisarput. Eqqumiitsuliornermut Aningaasaateqarfiup inatsisitigut sinaakkutissai Kalaallit Nunaanni Eqqumiitsuliornermut Aningaasaateqarfik pillugu Namminersorlutik Oqartussat nalunaarutaat nr. 43, 13. august 2021-meersumiippat, tassanilu §§ 12 aamma 13-imi allassimapput:

” § 12. Siulersuisut eqqumiitsulioriaatsinut tamanut suliamut paasisimasalimmik sinniisussamillu ataatsimik ukiuni marlunni atuuffeqartussanik toqqaassapput, ukunani:

- 1) Illussanik titartaaneq,
- 2) assilissanik eqqumiitsuliorneq,
- 3) filmiliorneq,
- 4) assassukkanik eqqumiitsuliat ilusilersuinerlu,
- 5) atuakkiorneq,
- 6) nipilersorneq, aamma
- 7) isiginnaartitsineq.

Imm. 2. Tamatumunnga suliamik paasisimasalik sinniisussaalu kalaallit eqqumiitsuluaannut aammalu suliamik paasisimasallip eqqumiitsulioriaatsimut aalajangersimasumut sammisaanut ilisimasaqangaatsiassapput.

Imm. 3. Suliamik paasisimasallit ataasiarlutik toqqaqqinneqarsinnaapput.

§ 13. Suliamik paasisimasallit eqqumiitsulioriaatsimi ilisimasaminni qinnuteqaatinik tiguneqartunik nalilersuissapput aammalu tapiissutinik agguuassisarneq, matumani tapiissutit angissusiat, ilusiat piffissarlu tapiissuteqarfiusoq pillugit Kalaallit Nunaanni Eqqumiitsuliornermut Aningaasaateqarfimmi siulersuisunut inassuteqaasiussallutik.

Imm. 2. Sulianik paasisimasalinnit inassuteqaatit tunngavigalugit siulersuisut tapiissutinik

tunniussissapput. Suliamik paasisimasallit inassuteqaataannut siulersuisut pisussaaffeqanngillat."

Taamaattumik Eqqumiitsuliornermut Aningaasaateqarfiup pilersinneqarneratigut naalackersuinikkut suliaqartut akulerussinnaajunnaarsinneqarput, tassami aalajangiisamerit Naalackersuisunit Eqqumiitsuliornermut Aningaasaateqarfiup siulersuisuinut nuunneqarmata. Taassumalu saniatigut aamma qulakkeerneqarpoq tapiissutissanik pingaarnersiunerit naalackersuinikkut periusissianit aallaaveqartannginnissaat, ilisimasaqartulli naliliinerannik tunngavilersorneqartassallutik. Ataqqinninnermi tunniuttakkanik tapisiaqartitsinnermi allaffissornikkut ingerlatsinnermi aamma siunertarineqarpoq naalackersuinikkut suliaqartut akulerussinnaajunnaarsinneqarnissaat, taamaattumik Naalackersuisut ataqqinninnermi tunniuttakkanik tapisiaqartitsisassanngillat, eqqumiitsuliornermut aningaasaateqarfiulli siulersuisuinit isumagineqartassalluni. Taassuma saniatigut qulakkeerneqarpoq ataqqinninnermi tunniuttakkanik tapisiaqartitsineq pisassasoq eqqumiitsuliornermut pinngortinneqarsimasut nalillerneqarnerisigut kiisalu eqqumiitsuliornermik ilisimasaqartut naliliineratigut naliliinikkut, tassami siulersuisunut ilaammata eqqumiitsulioriaatsinut arfineq marlunnet immikkut paasisimasaqartut.

Aamma Eqqumiitsuliornermut Aningaasaateqarfik pillugu nalunaarummi § 7-imi tapiissuteqarnermi ammasuunissaq qulakkeerneqarpoq, tassami siulersuisut ukiut tamaasa ukiumoortumik nalunaarusiortassammata tapiissutinik ingerlatsineq pillugu:

"§ 7. Siulersuisut aningaasaateqarfiup sulineranut pingaarnertigut najoqqutassanik aalajangersaassapput. Aningaasaateqarfiup atuunnermini ammasuunissaa paasiuminartuunissaalu siulersuisut qulakkiassavaat.

Imm. 2. Aningaasaateqarfiup sulinera pillugu Kultureqarnermut Naalackersuisoqarfimmut ukiumoortumik siulersuisut nalunaarusiortassapput. Nalunaarut tamanut saqqummiunneqartassaaq.

Imm. 3. Ukiumoortumik nalunaarummi siulersuisut ukiumut tapiissutit nassuiassavaat, imatut agguanneqassalluni:

- 1) eqqumiitsulioriaatsit ataasiakkaat,
- 2) tapeeriaatsit ataasiakkaat,
- 3) pissarsisup najugaa, kommunikkaartumik naatsorsorlugu,
- 4) pissarsisup suaassusaa,
- 5) pissarsisup ukiui, ukiut akuttussusaaq naleqquttut naatsorsorlugit,
- 6) nutaat siusinnerusukkullu aningaasaateqarfimmit tapiissutinik pissarsisut, aamma
- 7) nutaat siusinnerusukkullu aningaasaateqarfimmit tapiissutinik itigartinneqarsimasut.

Imm. 4. Tamatuma saniatigut aningaasaateqarfimmi aningaasaqarnermut sulisoqarnermullu pissutsit nalunaarummi nassuiarneqassapput."

Akissarsisitsinikkut tapiissuteqarnermi aamma taamatut periaaseqartoqarnissaa naatsorsuutigineqarpoq, tapiissutinilli qinnuteqartoqartassanani. Piareersaatit eqqumiitsuliornermut aningaasaateqarfiup isumagisassavai, soorlu immikkut paasisimasalinnik ataatsimiititaliaqassanersoq siulersuisunut innersuussuteqartartussamik imaluunniit immikkut paasisimasallit ataatsimoorlutik eqqumiitsuliornermut eqqumiitsuliornermut pilersitaanik nalilersuisassanersut siulersuisullu innersuussinerat tunngavigalugu siulersuisuni nalunaarusiassap suliarineqarnerani oqaluserineqassallutik aningaasaateqarfik aamma eqqumiitsuliornermut kattuffiat peqatigalugit.

Ataatsimiititaliap tunngaviit qanoq isikkoqassanerannik apeqquteqarneranut tunngatillugu ataqqinaammik tunissutisisitsisarnermi suut pingaartinneqartassanersut, tunngaviit pingaarnerit nalunaarusiornikkut aalajangersarneqassapput taakkulu eqqumiitsulioriaatsinut tamanut tunngassuteqassapput, naalakkersuinermilli suliaqartut akulerussinnaatitaannginnerannut tunngatillugu, Naalakkersuisummi eqqumiitsuliornermut ilisimasaqarluarnissaq pingaartimmassuk, Eqqumiitsuliornermut Aningaasaateqarfimmut naliliinermi tunngavissioinnissaq isumagissassanngortinneqassasoq naatsorsuutigineqarpoq, soorlu eqqumiitsulioriaatsini ataasiakkaani tunngavigineqartussat. Nalunaarusiornikkut tunngavissat uku isumaliutigineqarput:

Pineqartumit aallaaveqarsinnaassuseqarneq: Ataqqinaammik tunissutisisitsisarneq eqqumiitsulioriumut ataqqinninneruvoq aamma pineqartumut tapiissuteqarnerulluni eqqumiitsulioritup pinngorartitsinera tunngavigalugu. Eqqumiitsulioritup pinngorartitsinerup pineqartumit aallaaveqarnera pingaartinneqartassaaq immikkuullarissutullu ilusiligaassalluni tiguisussamat qaffasissunik illuatungeriissunik misigissutsinik, isumaliutinik aamma isumassarsianik tunisisassalluni.

Akisuatitsisinnaassuseqarneq: Eqqumiitsulioritup pinngorartitat inuit akornanni, inuiaqatigiinni aamma silarsuarmi paasinninnermik, atassusiinnermik aamma ataatsimoornermik pilersitsisinnaassuseqassapput.

Alapernaassuseqarneq: Eqqumiitsulioritup sulineq silarsuarmut alapernaassusermik ingerlanneqassaaq isumassarsiamut, oqaluttuarisaanermut, piffissamat naligisamat aamma eqqumiitsuliornerup avatangiiserisaanut isumalioqqissaarnissamik tunngaveqassalluni.

Nutaanik isumaliorsinnaassuseqarneq: Eqqumiitsulioritup isumassarsianik, isumaliorsinnaassusermik aamma isiginneriaatsinik nutaanik isumaliortitsisinnaassuseqartunik ilusiliisinnaassuseqassaaq, nutaanillu paasinninnermik misilittakkanillu pilersitsisinnaassuseqassalluni.

Eqqumiitsuliornermik inerisaaneq:

Ilusaa, imarisaa aamma ataqatigiinneri erseqqarissapput, eqqumiitsulioriaaserlu sapiissusermik anersaaqassusermillu takutitsilluni eqqumiitsuliornerup immikkut "oqariutuutaanik", sunniuteqarsinnaassuseqarneranik nutartertuarsinnaassuseqarneranillu ineriartortitsisinnaassuseqassalluni.

Tunngavissat qulaaniittut assersuutaannaapput tunngavissallu soorunami nalilersorneqartassapput eqqumiitsulioritup pinngorartitaanut tamanut naleqqiullugit. Tassunga tunngatillugu aamma pingaaruteqarpoq eqqumiitsuliornermi pitsaassutsip salliutinneqarnissaa. Aamma ukioqassuseq isiginiartariaqarpoq, tassami eqqumiitsulioritup eqqumiitsuliornermi pilersitanik aalajangersimasunik tunuliaqutaqartariaqarmat. Soorlu oqaaseqaatini taaneqareersutut naammangilaq taamaallaat eqqumiitsulioritup piginnaasaqarluarnissaq. Ataqqinaammik tunissutisisitsisarneq eqqumiitsulioritup pinngorartitaanik eqqumiitsuliornermik ilisimasaqartunit naliliinerit tunngavigalugit piviusunngortinneqartarpoq.

Naggataatigut erseqqissarneqassaaq malittarisassiornissaq eqqumiitsuliornermut aningaasaateqarfik aamma eqqumiitsuliortut kattuffii peqatigalugit aalajangersorneqassammat.

2. Eqqumiitsulioriaatsit assigiinngitsut akornanni ataqqinaammik tunniussisarnerit qanoq agguataarneqartassanersut pillugu Naalakkersuisut nassuiaateqaqquneqarput.

Naalakkersuisut akissutaat:

Siunnersuutip sularineqarnerani siunnersuutip piviusunngortinneqarnissaa oqaluuserineqarsimavoq. Eqqumiitsuliornermut inatsimmi eqqumiitsulioriaatsit arfineq marluk akornanni ataqqinaammik tunissutisitsinermi periaasissanik assigiinngitsunik peqartoq. Ataqqinaammik tunissutisitsinermi eqqumiitsulioriaatsit ilaasa kattunneqarsinnaanerat takorloorneqarsinnaavoq, soorlu ataqqinaammik tunissutisitsinermi eqqumiitsulioriaatsit sisamannngortinneqarsinnaapput, soorlu assersuutigalugu:

1. Atuakkiorneq – ataqqinaammik tunissutisitsineq ataaseq
2. Assilissanik eqqumiitsuliorneq – ataqqinaammik tunissutisitsineq ataaseq
3. Filmiliorneq aamma isiginnaartitsineq – ataqqinaammik tunissutisitsineq ataaseq
4. Illussanik titartaaneq, assassukkanik eqqumiitsuliat ilusilersuinerlu – ataqqinaammik tunissutisitsineq ataaseq

Periaasissaq alla tassaasinnaavoq ataqqinaammik tunissutisitsineq eqqumiitsulioriaatsinut arfineq marlunnut agguanneqartoq, soorlu sisamat tunniunneqarlutik eqqumiitsulioriaatsinut assigiinngitsunut sisamanut, ukiullu qulit qaangiunnerisigut nutaanillu ataqqinaammik tunissutisitsinerit eqqumiitsulioriaatsinut sinneruttunut pingasunut agguanneqassapput kiisalu eqqumiitsulioriaatsimut ataatsimut allamut sionatigut tunissutisitsiffioreersumut. Agguaassineq nalunaarusiornikkut aalajangersaaffigineqassasoq naatsorsuutigineqarpoq, tasanilu eqqumiitsulioriaatsit soorunami isiginiarneqassallutik. Naatsorsuutigineqarportaaq eqqumiitsuliortut kattuffii aamma eqqumiitsuliornermut aningaasaateqarfik nalunaarusiornermi peqataatinneqassasut.

3. Ataqqinaammik tunniuttakkat isertitat naapertorlugit tunniunneqartarnissaat pillugu allaqqasut pillugit Naalakkersuisut nassuiaateqaqquneqarput. Ataqqinaammik tunniuttakkat isertitat naapertorlugit annertussusilernissaannut isertitat sorliit atorineqartassanersut pillugu Naalakkersuisut akissuteqaatissaminni isummersuuteqaqquneqarput, eqqumiitsuliortup nammineq isertitai aallaavigineqassanersut imaluunniit illoqutigiinni isertitat allat sunniuteqaqataassanersut aammalu eqqumiitsuliortoq eqqumiitsuliornermi suliaminut allamik akissarsitinneqassagaluarpat ataqqinaammik tunniussassat aamma iluarsiiavigineqassanersut.

Naalakkersuisut akissutaat:

Ataqqinninnermik tunissutisitsinermi eqqumiitsuliortoq tapiiffigineqartarpoq. Inummut tapiissutaavoq, ataqqinaataassalluni pisortanit ikiorsiissutaanngitsoq eqqumiitsuliortup imminut napaniutissaatut siunertaqartoq. Taamaattumik eqqumiitsuliortup nammineq

isertitai taamaallaat aallaavigineqassapput, inoqutigiillu isersitaat imaluunniit ilaquariit isertitaat aallaavigineqassanngillat.

Isertitanut aaqqiissuteqarnermi eqqumiitsuliortup akileraarusiineri isertitaasa annertussusiligaanerat aallaavigineqassaaq. Taamaattumik eqqumiitsuliortup ataqqinninnermik tunissutisitsineri pissarsiassai ukiumit ukiumut allanngorarsinnaapput apeqqutaatillugit eqqumiitsuliortup akileraarusiineri isertitaasa annertussusiligaanerat.

Eqqumiitsuliortoq, eqqumiitsuliortuunera pillugu nersornaammik allamik tunineqarpat, ataqqinninnermik tunissutisitsineri pissarsiassat appartillugit aaqqiiffigineqassapput, tamanna akileraarnermi isertitaliineri malittarisassat naapertorlugit isertitanut ilaatinneqassanersoq. Aningaasaqarnermut aamma Naligiissitaanermut Naalackersuisoqarfimmik siunnersuut pillugu tusarniaaffigineqarmat akissutigineqarpoq ataqqinninnermik tunissutisitsineq aamma nersornaasiineq akileraarnermi isertitanut inatsimmi § 13 naapertorlugu nalinginnaasumik isertitanut A-nut naatsorsuunneqartassasoq.

4. Siuliani apeqqutigineqartumut tapiliullugu Naalackersuisut qinnuigineqarput annertussusiliisarneq 1:1 atorlugu isertitat naapertorlugit annertussusiliisarnissaq naatsorsuutigineqarnersoq nassuiaateqaqqullugit, kiisalu naatsorsuutigineqarnersoq allamik isertitaqarnermut atatillugu ataqqinaammik tunniussisoqarnissaa pinngitsuussagaluarpat isertitat naapertorlugit annertussusiliisarneq miinnerpaaffissalerneqassanersoq.

Naalackersuisut akissutaat:

Ataqqinninnermik tunissutisitsinerup piviusunngortinneqarnerani isertitatigut aaqqiissuteqartarnissap allaffissornikkut ingerlatsinerup sapinngisamik pisariitsuunissaa pingaartinneqarpoq. Isertitatigut aaqqiissuteqarnissaq 1:1-iussanngilaq, soorlu eqqumiitsuliortoq 200.000 kr.-nik isertitaqarsimappat ataqqinninnermik tunissutisitsineq aaqqiiffigineqassasoq 200.000 kr.-nik appaaffigalugu, eqqumiitsuliortumullu tunniunneqartussanngussallutik 50.000 kr.-t.

Siunnersuummi aalajangerneqarpoq 250.000 kr.-t tassaassasut annertunerpaaffiusussat, isertitanillu aaqqiissuteqartinneqartassasoq taakku aningaasat appartinnerisigut. Tullinnguuttumi assersuummi takutinneqarpoq isertitanik aaqqiissuteqarnermi periaaseq qanoq isikkoqarsinnaanersoq Assersuummi isertitanik killiliussat marluk takutinneqarput. Killiliussami siullermi killiliunneqarsimasoq tunissutisitsineri tunniutassaq ilanngaaffigineqassanngilaq. Taanna killiliussatut appasinnertut taaneqarsinnaavoq. Aappaani killiliussami tunissutisitsineri tunniutassaq appasinnerpaaffimminiippoq. Tassani isertitanik killiliussaq qaffasinnerpaaffimminiippoq. Assersuutitut takusassiarissagaanni assersuummi isertitanut killiliussat ukuupput: Aammut killiliussaavoq 200.000 kr., qummullu killiliussaalluni 400.000 kr. Erseqqissarneqassaarli maannakkut sulii aalajangerneqarsimannngimmat killiliunneqartussat qanoq isikkoqarumaarnersut.

Tunniuttagaq qaffasinnerneq: Eqqumiitsuliortoq agguaqatigiissillugu akileraarutigineqartussat isertitat naapertorlugit ataqqinaammik tunissutisitsinerup

avataatigut 200.000 kr.-t ataallugit isertitaqarsimaguni taassuma eqqumiitsuliortup tunniuttagaq tamaat pisassavaa, tassaasorlu 250.000 kr.

Tunniuttagaq qeqqaniittoq: Eqqumiitsuliortoq agguaqatigiissillugu akileraarutigineqartussat isertitat naapertorlugit ataqqinaammik tunissutisisitsinerup avataatigut 200.000 kr.-t qaangerlugit isertitaqarsimaguni eqqumiitsuliortup taassuma tunniuttagaq qaffasinneq killigititamik qaangiinerup 75 %-ianik ilanngarlugi pisassavaa.

Assersuutitut isertitat 300.000 kr.-t qaangersimappatigit qaangiineq 100.000 kr.-usimassaaq. Eqqumiitsuliortup pisassavai 250.000 kr.-t 100.000 kr.-t 75 procentiannik (tassaasoq 75.000 kr.) ilanngarlugit, tasanilu assersuummi eqqumiitsuliortup pisassavai 175.000 kr.-t.

Isertitat 360.000 kr.-uppata, qaangiineq 160.000 kr.-usimassaaq. Eqqumiitsuliortup pisassavai 250.000 kr.-t 160.000 kr.-t 75 procentiannik (tassaasoq 120.000 kr.) ilanngarlugit, tasanilu assersuummi eqqumiitsuliortup pisassavai 130.000 kr.-t.

Tunniuttagaq minnerpaaq: Eqqumiitsuliortoq agguaqatigiissillugu akileraarutigineqartussat isertitat naapertorlugit ataqqinaammik tunissutisisitsinerup avataatigut 400.000 kr.-t qaangerlugit isertitaqarsimaguni taassuma eqqumiitsuliortup tunniuttagaq minnerpaaq 100.000 kr.-usooq pisassavaa.

Qulaani assersuummi ammut killiliussami tunniuttagaq minnerpaaaffimminiippoq, taannalu tunniunneqartassaaq isersitat qanorluunniit qaffasissuseqaraluarpata. Siunnersuummulli oqaaseqaatini nassuiaatigineqarpoq tunniuttakkamik pinngitsoorani minnerpaaffiliinissaq siunniunneqanngitsoq. Tassami eqqarsaatigineqarsinnaammat, kisitsit aalajangersimasooq akileraarutigineqartussat isertitat qaangersimappatigit, tunniuttakkamik pisartagaqartoqarsinnaanngitsoq, taamaakkaluartorli eqqumiitsuliortoq ataqqinaammik tunissutisisimasutut nalunaarsorneqassaaq.

Isertitanut killiliussanik Naalackersuisoqarfiup misissuinermini paasinierpaa nunani avannarlerni allani eqqumiitsuliortut qanoq sutigullu ataqqinaaserneqartarnersut. Tassunga atatillugu Danmarkimi ataqqinaammik tunissutisisitsisarneq aamma Savalimmiuni eqqumiitsuliortunut akissarsiaqartitsineq Naalackersuisoqarfiup maluginiarsimavai. Danmarkimi eqqumiitsuliortunut 1. januar 2014-ip kingornatigut ataqqinaammik tunissutisisinneqarsimasunut tunniuttakkamut minnerpaaqqangilaq. Imaapporlu eqqumiitsuliortut isertitanik akileraarutigineqartussanik ukiumut 426.000 kr.-t missaannik imaluunniit qaangerlugit isertitaqarsimagunik taakku aningaasanik pisartagaqassanngillat. Savalimmiuni eqqumiitsuliortut eqqumiitsuliortut akissarsiaannik taaguutilinnik pissarsitinneqartarput, atuarfimmilu ilinniartitsisutut løntrin 21, niveau 1-imisut akissarsiaqartinneqartarlutik. Naalackersuisoqarfiup maluginierpaa nunani avannarlerni eqqumiitsuliortunut ataqqinninniutit assigiinngisitaartorujussuunerat. Taamaattumik eqqumiitsuliortut taakkulu kattuffii suleqatigalugit nalunaarutissap ilusilersorneqarnissaa uannut pingaartuuvoq.

5. Oqaaseqaatini arlalitsigut allaqqavoq ataqqinaatissiissutinut tunniunneqartartunut aningaasat annerpaaq 250.000 kr.-iusut. Taamaattorli inatsimmi ima allaqqalluni 2/2 aningaasat tunngaviusut ukiumut ataatsimut 250.000 kr.-iusut aningaasallu tunngaviusut procenti aqqiissutissaq naapertorlugi

**iluarsineqartassasut aningaasallu isertitat naapertorlugit
annertussusilerneqartassasut. Ataqqinaammik tunniuttakkat
annertunerpaaffissaata procentilu aaqqiissutissaq naapertorlugu iluarsisarnerup
imminnut ataqatigiinnerat pillugu Naalackersuisut
erseqqissaassuteqaqquneqarput.**

Akissut:

Siunnersuummi aalajangerneqarpoq ataqqinaammik tunissutisisitsinermi isertitat tunngavigalugit aaqqiisoqartassasoq. Isertitat tunngavigalugit aaqqiisoqartarnissaanut tunngatillugu siunnersuummi aalajangerneqarpoq, Naalackersuisut piginnaatinneqassasut isertitat tunngavigalugit aaqqiissuteqartoqartarnissaanut tunngavissanik aalajangersaasinnaammut. Tamanna taamaattumik nalunaarusiornikkut pissaaq. Tamanna iluarnerusut nalilerneqarpoq, isertitammi tunngavigalugit aaqqiissuteqartarnissaq teknikkimut tunngassuteqarnerummat. Taavalu § 8b-mut immikkut oqaaseqaatini allassimavoq:

"Isertitat naapertorlugit aaqqiissuteqartarnissaq imatut piviusunngortinneqarsinnaavoq, nalunaarummi aalajangerneqartoq tunngavittut aallaavigisaq 250.000 kr.-usooq tassaasoq qummut killigitinneqartoq, taannalu nalunaarummi aalajangersakkat naapertorlugit appartinneqarsinnaasoq ukiumi pineqartumi pisartagaqartup isertitai naapertorlugit. Nalunaarutikkut aamma aalajangerneqarsinnaapput ataqqinninnermi tunniuttakkanut ammut killigitinneqartussat. Ataqqinninnermi tunniuttakkat ammut killiliiffiqineqannginnissaat aamma eqqarsaatigineqarsinnaavoq.

Taakku saniatigut aamma malittarisassiuunneqarsinnaavoq isertitat qanoq ittut ataqqinninnermi tunniuttakkat naatsorsorneqarnissaannut tunngavissanngortinneqassanersut."

Tunniuttagaq tunngaviusoq tassaavoq pisartagaq, eqqumiitsuliortumut aallaqqaataani tunniunneqartartussamut isertitanut aaqqiissuteqarnermi aallaavigineqartartussaq. Tunniuttagaq tunngaviusoq aamma tassaavoq tunniuttagaq qaffasinneq eqqumiitsuliortup pissarsiarisinnaasaa, isertitanummi aaqqiissuteqarnermi taamaallaat siunertarineqartarmat ammut aaqqiissuteqarnissaq eqqumiitsuliortup isertitai naapertorlugit.

Aaqqiissutip ingerlaavartumik akinut naleqqiullugu tapiissutini pisortanit isumagineqartartuni assigiimmik aaqqiissuteqartarnissaq qulakkiissagaa § 8b-mut oqaaseqaatini allassimavoq. Aamma oqaaseqaatini allassimavoq, procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni siunertaasoq pisortat nalinginnaasunut tapiissuteqartarneranni atortinneqartarnissaa, aaqqiissuteqartarnerullu ingerlaavartumik pisassasut aamma assigiimmik aaqqiissuteqartoqartassasoq pisortat tapiissutigisartagaannik.

Aaqqiissutissaq procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat nr. 9, 1. juni 2017-imeersoq naapertorlugu isumagineqartarpoq, tassanilu allassimavoq Naalackersuisut ukiut tamaasa aaqqiissutissaq procenti aalajangertassagaat aningaasanut inatsimmi pineqartumi. Inatsimmi § 1 imm. 1-imi allassimavoq procenti aaqqiissutissaq nuussinikkut isertitanut, akileraarutinut, akitsuutinut il.il. atuutsinneqassasoq, taannaavorlu pisortani atorfeqartut ukiumoortumik

akissarsiaannik procentitigut aaqqiinnermi najoqqutarineqartartoq ukioq akissarsiorfissaq sioqqullugu.

Taamaattumik ataqqinninnermi tunniuttakkat procentillu aaqqiissutissap ataqatigiinnerannut tunngaviuvoq ataqqinninnermi tunniuttagaq qaffasineq ukiumit ukiumut aaqqiiffigineqartassamat procenti aaqqiissutissaq atorlugu. Tunniuttagaq qeqqaniittoq aamma tunniuttagaq minnerpaaq atuutissatillugit aamma taakku procenti aaqqiissutissaq atorlugu aaqqiiffigineqartassapput.

Naggataatigut oqaaseqaatit:

Ataatsimiititaliap apeqqutaanut naggasiutitut oqaaseqalaassaanga. Maluginiarpara apeqqutit tallimaasut assigiissuteqartut, tamarmillu nalunaarusiassatut naatsorsuutigineqartup imassaanut tunngassuteqarput, taannalu inatsisissatut siunnersuutigineqartumi piginnaatitsissutinik tunngaveqassaaq. Tassunga tunngatillugu erseqqissassavara siunnersuut piareersarneqarnerani isumaliutigilluarneqarsimamat ataqqinninnermi tunniuttakkat inatsisitigut nalunaarutitigullu aalajangersaaffigineqassanersut. Tassani isumaliutigineqarnerani tunniuttakkat nutaajunerat isiginiarneqarsimavoq. Taamaattumik ataqqinninnermi tunniuttakkat aaqqiiffigineqartarnissaat inatsisitigut tunngavissaqarnissaa Danmarkimut naleqqiullugu pingaartinneqarnerusimavoq. Aamma taamani ataatsimiititaliap UKA 2019/156 pillugu isumaliutissiissutaani allassimavoq:

"Taamatut nunatta karsianut pisussaaffiliinissamik naliliineq inatsisitigut ersarissumik tunngavissiiinissaq ataatsimiititaliamit Naalakkersuisunut naliliiffigeqquneqarpoq, Naalakkersuisullu kaammattorlugit inatsisitigut tunngavissaqarnissamik piunasaqaat siunnersuutip aappassaaneerneqarneranut oqaaseqarfigeqqullugu. Inatsisitigut tunngavissaqaraluarpalluunniit ataatsimiititaliaq isumaqarpoq taamatut tapeeriaatsit ukiut arlallit nunatta karsianut pisussaaffiliisut ersarissumik malittarisassaqaarnissaat qulakkeerneqartariaqartoq. Tamatumani ukiut arlerlugit aningaasanik tunniussinermi malittarisassat piunasaqaatit tunngavissallu aalajangersarneqarnissaat periarfissinneqaaqqullugu – assersuutigalugu nalunaarusiornikkut."

Taamani ataatsimiititaliap taamaattumik saqqummiuppaa ataqqinninnermi tunniuttakkanut piunasaqaatit aamma tunngavissat nalunaarusiornikkut aalajangersaaffigineqassasut. Taakku isumaliutigineqarsimasut siunnersuutip suliarneqarnerani isiginiarneqarsimapput. Ataatsimiititaliamilli siunnersuut pillugu oqaloqateqarnissamut peqataasinnaavunga, ataatsimiititaliap siunnersuummut isumaliutai, nalunaarusiassat ilusilerneqarnissaat kiisalu siunnersuutip nalinginnaasumik piviusunngortinneqarnissaa pillugu, tamannami tamanit orniginartinneqarmat eqqarsaatigalugit eqqumiitsuliortutta atugaannut tunngasut.

Inussiarnersumik inuulluaqqusillunga



Peter Olsen